

**W**

Je Ferdinand von Gots gnaden Römischer König/ zu allen zeiten merer des Reichs/ in Germanien/ zu Hungern/ Beham/ Dalmatien/ Croatien/ vñ Sclauonien ic. König/ Infant in Hispanien/ Erzherzog zu Osterreich/ Herzog zu Burgundi/ Steyr/ Kärndten/ Crain/ vnd Wirtemberg ic. Graue zu Tyrol ic. Embieten allen vnd jeden vnsern vnd des heyligen Reichs Churfürsten/ Fürsten/ Geyslichen vnd Weltlichen/ Prelaten/ Bawen/ Freyen/ herren/ Rittern/ Knechten/ Hauptleuten/ Landvögten/ Vitzthumben/ Vögten/ Pflegern/ Der wesen/ Amptleuten/ Schultheysen/ Burgermeystern/ Richtern/ Räten/ Burgern/ Gemeynenden / vñnd sonst allen andern vnsern vñnd des Reichs vnderthanen vñnd getrewen/ wirdet/ vnser Lieb/ Gnad/ vnd alles guts. Hoch vnd Erwürdigen / Hochgebornen/ lieben Freund/ Neuen/ Vetter/ Schwäger / Ohaim/ Churfürsten vnd Fürsten/ auch Wolferlichen Maiestat vnsern lieben Bruders vnd Herrn verordenten Commissarien/ auch Churfürsten/ Fürsten/ vnd Stenden des heyligen Römischen Reichs / ernstliche Mandata der seye/ bey schweren straffen vnd peenen / wider obbemelten vnsern lieben Bruder vnd Herrn / die Kay. Maiestat/ vns noch vnser Land vñnd Leut/ oder auch andere vnser vnd selbs yemanz darzu bewegen oder auffwiegeln/ Das auch alle hohe vnd nidere Obügkayten/ inn iren Fürstenthumben/ Herrschafften/ Obügkayten vnd Gebieten / solches den jerrigen Klerlicher mit sich bringen. Wir vns auch volgendes auff dem nechst allhie gehalten Reichstag / abermalen mit obgemelten Kaiserlichen Commissarien / auch dem Churfürstlichen Stand/ zu handhabung vnd volziehung obbestimpter vnser Mandaten/ vnd der Reichs Abschide/ gegen den vngheorsamen vnd verbrechern/ mit der gesetzten Ernstlichen straff/ als nemlich mit nachschickung irer weib vnd kinder/ auch mit confiscierung vnd einziehung irer güter / vnd wo sy betreten werden / gegen iren personen mit sencklicher annemung vnd straff an leib vnd leben vnuerzogenlich vofarn sollen vnd wöllen/ Wo auch ainiche Obügkayt darinn seumig / verhinderlich oder vngheorsam sein würde/ das dieselbig damit vnuerzogenlich procedirt vnd verfaru werden solle. So werden wir doch vber solchs alles glaubwürdig bericht / wie auch solchs offenbar am tag ist / das solchen gemachten Reichs Abschiden/ auch vnsern darüber außgangen Mandaten gar nit gelebt noch gehorsamet / vnd vngachtet der selben / die Knecht aus dem Reich Teutscher Nation/ von viln durch die Obügkayten an mer Enden/ mit der gesetzten straff nit vofarn wirdet. Des wir an statt vnd in Namen obgemelter Keyserlicher Maiestat/ auch für vns selbs/ dergleichen Gemeyne Reichs stend/ gegen den vngheorsamen nit vnbillich groß mißfallen vnd beschwerung tragen/ angesehen das aus solcher offenbaren vnd freylichen vngheorsame/ der Römischen Kay. Maiestat/ vns/ gemeynen Reichs stenden/ vnd ganzer Christenheyt/ nit allein von wegen gemeyner Christenheyt Erbfeinds des Türckens/ das dem vmb souil weniger nachteyligen weitlenffigkeit / vnrat vnd empörung vsach gibt / wie dann dasselb im werck augenscheinlich gespürt vñnd befunden wirdet. Derhalben vns in Namen der Kay. Maiestat/ auch für vns selbs keyns wegs gemeynt noch leidlich sein will/ solche offenbare vnd freyenliche vngheorsame fürterhin zusehen oder zu gestatten / sonder das gegen den ten gemäß/ verfaru werde. Vnd wöllen demnach das obbestimbt zu Speyr außgegangen Mandat/ alles seines inhalts widerumb vernewert/ vnd Ewern Lieben Andachten/ Kay. vnd Königlicher Macht/ bey vermeidung der straffen vnd peenen / in dem obbestimbtten Speyrischen Mandat / dergleichen dem nechst allhieigen Reichs Abschid begriffen/ Ernstlich mandiert vnd gebotten haben/ das sich Ewer Kainer/ was stands der sey / fürter wider die Keyserlich Maiestat/ vns/ vnser Land vnd Leut/ auch andere vnser vnd des Reichs mitglieder / in ainiches frembden Potentaten oder anderer Herrn dienst begeben / bestellen / auffwiegeln oder gebrauchen lasse / noch selbs yemandts darzu bewege oder auffwiegeln/ Das auch alle vnd yede hohe vnd nidere Obügkayten/ vnd sonderlich die/ durch dero Obügkayten vnd Gebiet/ die auffwiegelen Knecht den Pass oder durchzug nemen mächten/ mit allem Ernst darob vnd daran sein/ auch derhalb ir güte achtung vnd kundschafft haben vnd bestellen/ das den Knechten der Pass vnd durchzug allenthalb abgestrickt vnd mit gestattet: auch gegen den verbrechern nach inhalt vnd außweisung obberürts Speyrischen Mandats/ vnd des jungst allhie gemachten Reichs Abschids/ mit vnnachleßlicher obberürts jungsten allhieigen Reichs abschids / gleicherweß auff die peen der Acht gestracks procedirt / vnd hierin niemants verschont werde. Das wolten wir Ewern Lieben willen vnd meynung. Geben in vnser vnd des Reichs statt Nürnberg/ den zehenden tag des monats Martij / nach Christi geburt fünffzehnhundert vnd im dreyvndvierzigsten vnser Reichs des Römischen im dreyzehenden/ vnd der andern im sybenzehenden jare.

Ferdinand

U. S. P.

A. S. P.

*[Faint handwritten notes and signatures in the bottom left corner.]*